

Gij Saeh “Ngawz” Seiz Lwgnyez

Seiz lwgnyez couh lumj fuk dozveh nei, veh rim gij saeh lai saek lai yiengh; seiz lwgnyez couh lumj caz va nei, duj beij duj gyaendei; seiz lwgnyez couh lumj bonj saw nei, geiq gij saeh “ngawz” seiz iq lwgnyez.

Mwh gou ndaej seiq bi, bihaenx seizdoeng doek naefaiq hung, gou raen rog ranz naefaiq mbinyagyag, couh buet bae gyanghongh auw fwngez coux nae, nae doek daengz ndaw fwngez couh cieq lo. Yienghneix, gou auw baujvnhbeih bae coux, nae hix baez doek daengz ndaw baujvnhbeih couh mbouj raen lo.

Naefaiq youq ndaw fwngez ndaw baujvnhbeih cungj dawz mbouj maenh, gou hoz yaek dek, cix naengh youq gwnz diegnae daej lo.

Baengzyoux ndei gou Siujhanz dingqnyu gou daej le buet gvaqdaej, dep rwz gou gangsebseb: “Gij saeh neix guh mbouj heih ha? Gou rox guh!”

Gou dingq le mbouj daej lo, ngiengx gyaecy ngeizvaeg yawj Siujhanz.

Lwgda de cienqvaegvaeg, riuhaa naeuz: “Mwngz yawj, mwh seizcin gyoengq nungzminz bohlungz doek faenhaeux roengz ndaw reih bae, gvaqlaeng couh hwnj haujai gomiuz, baenzneix raeuz seizneix ndaem naefaiq, daengz seizcin bi moq, mbouj couh did haujai naefaiq ha?”

Gij vah Siujhanz hawj gou fwt uk doeng hoz rox, caen najmboeng simhai lo.

Gou caeuc Siujhanz doxcaez bae daengz suenbyaek laeng ranz, dawz fag gvak iq, hag yiengh daxbuz hai fog byaek. Siujhanz gop naefaiq cuengq roengz ndaw fog bae le youh moek hwnjdaej.

Baez siengj daengz bi moq ndaw reih yaek maj naefaiq hwnjdaej, rim reih ndongqliklik, lij ndaej youq dangqnaej gyoengq doengzdoi iq angj mbat ndeu, gou couh yied guh yied miz rengz……

Gou muengh ha muengh, seizcin daengz lo,

vadauz, vamaekleiz, vadiabcin cungj hai lo, gofaex iq hix did ngaz moq lo.

Gou ngoenzngoengz bae suenbyaek yawj gij naefaiq gou did mbouj did ngaz, hoeng gou muengh da yaek doek, cix mbouj raen gij naefaiq ndaem youq ndaw suenbyaek neix did saek ngaz.

Miz ngoenz ndeu, gou caen naihhos mbouj ndaej gienh saeh neix lo, buet ma ranz cam daxmeh: “Seizcin daengz lo, vihmaz gij naefaiq gou ndaem haenx lij caengz did ngaz ne?”

Daxmeh song fwngez gop naj gou, riu ndaej mbaetgaed bae, menhmenh doiq gou naeuz: “Lwgnyez huk gou ha, aenvih naefaiq mbouj dwg gij ceh doenghgo, ndigah mbouj rox fat ngaz ha!”

Bi dam bi gvaqbae lo, moix bi baez raen naefaiq, gou lij gag ngeix daengz gij saeh “ngawz” seiz lwgnyez, gag riu bonjfaenh dwg “lwngawz”.

(*Ouhyangz Mwzginj/raiz Veiz Caijcinh/hoiz*)



Duz Manaex Rox Bi Rieng

Duz manaex ndeu doek roengz ndaw hongx bae lo, baenzlawz diuq hix diuq mbouj hwnjdaej. Doeklaeng, duz mbej geq ndeu byaijndwnwd gvaqdaej, duz manaex guhmuengz dongx duz mbej geq: “Beixnuengx! Vihliux cingzngaih beixnuengx, daej bangbang gou vei!”

Duz mbej geq cam: “Mwngz dwg bouxlawz? Vihmaz saet roengz aen hongx canghdkdaej cang bae?”

Duz manaex doq cang ok yiengh youh lauxsaed youh cojgvaq, naeuz: “Gou, mwngz mbouj rox ha? Duz ma youh cungeig youh sienhsoh ndeu, vihliux gouq duz gaeq iq doek hongx ndeu, gou maz cungj mbouj goq, mbouj lau vutmingh, sikhaek diuq roengzdaej, couh hwnjbae mbouj ndaej lo. Ai! Hojlienx hojlienx gou duz ma geq sienhsoh neix ba!”

Duz mbej geq yawj de geij baez, miz di mbouj saenq, naeuz: “Mwngz caen dwg ma ha? Vihmaz mwngz yawj hwnjbae baenzneix lumj manaex, vihmaz mwngz yawj gou fouq lwgda mwngz yak lumj manaex nei?”

Duz manaex guhmuengz buenq laep da naeuz: “Gou dwg ma’ ngauz, ndigah miz di lumj manaex. Hoeng, cingj mwngz saenq, gou cingqcaen dwg duzma. Gou hozraez dangqmaz, gou lij rox bi rieng dem. Mbouj saenq mwngz yawj, diuz rieng gou bi ndaej geilai ndei.”

Duz manaex vihliux cwnqmingz vah bonjfaenh, couh beng diuz rieng geng de bi geij mbat. “Bubu, bu!” Ndaw hongx miz geij ndaek doem cungj deng de saenq roengzbae lo.

Duz mbej geq vuengmuengz doenqlaeng yamq ndeu, naeuz: “Dwg lo, mwngz rox bi rieng. Hoeng duz rox bi rieng mbouj itdingh cungj dwg ma. Mwngz naeuz, mwngz caen dwg duz ma’ ngauz ma?”

Duz manaex miz di naih mbouj ndaej lo: “Mboujloek, mboujloek! Gou mieng gou dwg. Vaiq di, vaiq di vei! Vihliux cingzngaih beixnuengx, dan auw mwngz iet faj ga ndeu roengzdaej, gou sikhaek hwnjbae ndaej lo. Gou okbae ndaej couh sikhaek bauqdap mwngz. Beijlumj, gou ndaej bang mwngz rizriz bwn, bang mwngz haebhaeb duznaenz. Caen bw, gou maij mbej raixcaix, daegbied dwg mbej geq.”

Duz mbej geq lij dwg miz di ngeizlaengx, youh doenqlaeng yamq ndeu: “Mbouj ndaej, gou auw naemjnaemj gonq.”

Seizneix, duz manaex caen naih mbouj ndaej lo, sawqmwh fatheiq. De mbe aen bak ok, loh ok gij heuj soemsadsad de, doiq duz mbej geq rongx naeuz: “Mwngz duz geggak neix! Mbouj vaiq di gvaqdaej, mwngz siengj guh gijmaz?!”

Duz mbej geq caemdingh yawj de da ndeu, menhmenh dap naeuz: “Maz cungj mbouj guh. Aenvih mwngz dwg manaex. Gou yawjaen gaiq heuj soem mwngz lo. Bi’ gvaq seiznit mwngz haeb gou gaemz ndeu, ceng di couh haeb dai gou. Gou daengxcieh hix lumz mbouj ndaej. Mwngz couhcinj rox bi rieng hix yaeuh mbouj ndaej gou, gou bae lo, baezlaeng mbouj doxraen lo!”

(*Yenz Vwnzcingj/raiz Cwz Fanghdingz/hoiz*)

Guh Saehndei Ceiq Angq



Ngoenzhaenx gvaqringz cuengqhag le, gou ngamq yaek dauq ranz, mbwn sawqmwh laep roengzdaej. Mbouj ndei, yaek doekfwn lo, gou ganjgaenj byaij yamq laux.

Fwn naeuz doek couh doek, “dida!” naed fwn lumj naed duh haenx doek youq gwnz naj gou. Riengzlaeng, naed fwn engq deih engq hung daj gwnzmbwn gig vaiq “dub” roengzdaej. Mbouj miz banhfap, gou cijndei ndwn daengz laj yiemhranz bouqgaicawx ndeu ndoj fwn.

Ndwn youq bakdou gaenq yingyangj daengz vunz guh gaicawx, yienzbonj gou yaek haeubae cawx bingz raemx ndeu guh di “eiqsei”, doeklaeng lumh daengx ndang, faen cienz ndeu

hix ra mbouj raen. Bingzseiz gou mbouj daiq soujgih youq ndang, gwqneix hojguh lo.

Fwn yied doek yied hung, rwed maqmuengh ndaw sim gou ndaep. Mwh gou yawj gij fwnhung haenx ngaenzngwdngwd, “gvandang” sing ndeu, dou bouq hai lo. Yah buzgeq ndeu ok dou daej, de fwngez ndeu dawz faexdwngx saenzfaenfaen, fwngez ndeu lij gaem doxgaiq. De yienh doxgaiq ndaw fwngez de gvaqdaej——dwg aen liengj ndeu! Yahbuz bakunq doiq gou naeuz: “Lwgsau iq, gou yawj mwngz youq gizneix ndwn gig nanz lo, mwngz yawj fwn gwq ndeu daengx mbouj ndaej. Gou ciq mwngz aen liengj ndeu, mwngz ganjgaenj ma ranz ba!” Gou mbouj gamj saenq, daj ndaw fwngez yahbuz cieq gvaq aenliengj, lienzlienx mbaiq yahbuz. Hoeng yahbuz cij dwg baet gen riunymnyum, hawj gou ganjgaenj dauq ranz……

Youq gwnz roen dauq ranz, gou itcig siengj: Yahbuz roxnaj gou ma? De vihmaz ciq liengj hawj gou boux najmoq neix ne?

Fwn doek le geij ngoenz, daengzlaeng mbwn gvengq lo. Ngoenz singhgiz, gou ganjgaenj dawz aen liengj haenx bae daengz aen bouq, ra yahbuz boiz liengj. De cingq naengh youq bakdou laepda yietnaiq, gou mbouj siengj heuh de singj, couh siujsim dawz aenliengj ing youq henz dougaexrag. Seizneix, gou myaegraen gwnz dou raiz le geij cih saw——Guh saehndei cei q angq.

Gou sikhaek fwt singj gvaqdaej, yienzlaiz, yahbuz ciq liengj hawj gou gaenbonj mbouj dwg loeklak——De itcig saedhengz “guh saehndei cei q angq”!

(*Du Swjmwz/raiz Lij Yanghlenz/hoiz*)